

Inatsisissatut siunnersuummut oqaaseqaatit

Oqaaseqaatit nalinginnaasut**1. Aallaqqaasiut***1.1. Siunnersuummut pingaarnertut tunuliaqutaasut*

Januar 2022-mi ilinniartitaaneq pillugu isumasioqatigiinnermut atatillugu Naalakkersuisut ilaatigut aalajangiipput ilinniartut suliffimmik misiliiffissamik siumoortumik qulakkeerisimangikkaluarlutik tunngaviusumik inuussutissarsiummik ilinniarnermik ilinniartut aallartissinnaanerit periarfissaalersillugu. Ilinniartut amerlanerusut ilinniagaqalernissaasa qulakkeerneqarnissaat pillugu pingaarnertigut anguniagaqarnermik aalajangiineq tunngaveqarpoq. Ilinniarfimmi sungiusarluni sulinertut annertuutigit aaqqissuunneqartumik inuussutissarsiuqatigalugu ilinniartitaanerit minillugit tunngaviusumik inuussutissarsiummik ilinniarnermik aallartissinnaanerit ilinniartut aallartinnnginnerminni lærlingitut isumaqatigiissuteqarnissaannik tunngaveqarnissaat pillugu inuussutissarsiuqatigalugu ilinniartitaaneq pillugu inatsimmi malunnartumik aaqqissugaaneranut aalajangiineq atassuteqarpoq. Tunngaviusumik inuussutissarsiummik ilinniarneq tassaavoq paarlakaaffiusumik ilinniarneq, tassani sungiusaammik sulineq ilinniarfimmiinnerlu paarlakaajaatsinneqartarlutik. Tunngaviusumik inuussutissarsiuqatigalugu ilinniartitsinnermut ilaapput tunngaviusumik ilinniartitsisutit, ilinniartitsisutit suliamut tunngasut, ilinniartitsisutit immikkut ittut kiisalu ilinniartitsisutit nammineq toqqagassaasut, piumasaqaataallunilu lærlingitut imaluunniit ilinniartinneqarnissamik isumaqatigiissuteqartoqarsimanissaa, qinnuteqartoq ilinniaatigaluni sungiusartutut ilinnialersimangippat.

Tulliuttumi inatsit atuuttoq naapertorlugu suliffimmi misiliiffimmi inissaq pillugu isumaqatigiissuummut naleqqiullugu taaguut "lærlingitut isumaqatigiissut" aamma isumaginninnermi peqqinnissaqarfimmilu lærlingitut isumaqatigiissuummut tunngatillugu taaguut "ilinniartinneqarnissamik isumaqatigiissut" atornerqarput. Taakku saniatigut sungiusarluni siliffigisami atorfinitsinneqarnermi pissutsit eqarsaatigalugit taaguut "sungiusarluni suliffik" atornerqarluni. Inatsisartut inatsisaanni atuuttumi § 25, imm. 2-mut nassuiaatinut atatillugu takuneqarsinnaavoq "ilinniartinneqarnissamik isumaqatigiissut" isumaginninnermi peqqinnissaqarfimmit lærlingitut isumaqatigiissutini atornerqartoq.

Siumoortumik lærlingitut isumaqatigiissuteqaqqaarnani imaluunniit ilinniartinneqarnissamik isumaqatigiissuteqaqqaarnani tunngaviusumik inuussutissarsiummik ilinniarnermik aallartissinnaanerit periarfissaq pillugu apeqqut Inuussutissarsiornikkut, Suliffeqarnikkut Ilinniartitaanikkullu suliniummut - suleqatigiissitamut H2-mut tunngatillugu taamanikkut suliniummut allattoqarfimmi oqallinnerni aamma tikillatsiarneqarpoq. Oqallinnerni ilaatigut pineqarput suliffimmi misiliiffissaq pillugu siumoortumik isumaqatigiissuteqaqqaarnani tunngaviusumik ingerlanerup aallartinnissaanut periarfissap ilanngunnissaanut sutigit

unamminartoqarnera pillugu apeqqut. Tassunga atatillugu aaqqiissutaasutut eqqaaneqarput inatsisinut piginnaasanullu tunngasut isumaliutit. Piginnaasanut naleqqiullugu naliliisoqarpoq ilinniarnerni aalajangersimasuni ilinniartut amerlanerusut tiguneqarsinnaassasut, siumoortumik lærlingitut isumaqatigiissuteqarnissaq imaluunniit ilinniartinneqarnissamik isumaqatigiissuteqarnissaq pillugu piumasaqaat naammassineqassanngippat.

Siunnersuut taamaattumik suliffimmik misiliiffissamik pissarsisinnaanngitsut ilinniartut tigunissaannut ammaannissaannut aamma ilinniartfinni piginnaasat pitsaanerusumik atorneqarnissaannik siunertaqarneq.

Naalackersuisulli aalajangiinerisa assigiinnanngilaa lærlingitut isumaqatigiissut imaluunniit ilinniartinneqarnissamik isumaqatigiissut pillugu piumasaqaat tunngaviusumik inuussutissarsiummik ilinniarnerniit piivinneqassasoq. Aalajangiineri siullermik pineqarpoq ilinniartutut suliffimmik misiliiffissamik siumoortumik qulakkeereerluni tunngaviusumik inuussutissarsiummik ilinniarnerni tiguneqarnissamut tamatuma piumasaqaataanissaa pillugu apeqqut.

Oqallinnermi taamaalilluni pineqarput lærlingitut siumoortumik isumaqatigiissuteqaaqqaarnani, assersuutigalugu ukiumik ataatsimik sivisussusilimmik ilinniartfinni tunngaviusumik ingerlatsinermik aallartiffiusumik paarlakaattumik ilinniarnikkut tunngaviusumik inuussutissarsiummik ilinniarnernit aaqqissuunnissaannut periarfissaq.

Lærlingitut isumaqatigiissuteqarnissaq imaluunniit ilinniartinneqarnissamik isumaqatigiissuteqarnissaq pillugu piumasaqaat suli atuutissaaq, aatsaalli ilinniarnerni ingerlanerani piffissami kingusinnerusumi atuutilissalluni. Peqatigisaanik tassunga ilaavoq ilinniarnerni ingerlanerani kingusinnerusumik lærlingitut isumaqatigiissummik imaluunniit ilinniartinneqarnissamik isumaqatigiissummik ilinniartup qulakkeerinninnissaanut pisussaaffik imaluunniit ilinniartup ilinniarnerni allatut naammassineqarnissaa isumagalugu.

Tamanna Inatsisartut inatsisaata allanngortinnissaa pillugu siunnersuummik matuminnga kinguneqarpoq, taamaalilluni tunngaviusumik inuussutissarsiummik ilinniarnerni nassuiaatit pillugit aalajangersakkat allanngortinneqarlutik. Peqatigisaanik siunnersuutigineqarpoq tunngaviusumik inuussutissarsiummik ilinniarnerni tunngavittut lærlingitut isumaqatigiissutit imaluunniit ilinniartinneqarnissamik isumaqatigiissut pillugu piumasaqaat ilinniarnerni isersinnaaneq pillugu Inatsisartut inatsisaanni aalajangersakkami erseqqissarneqassasut.

Aammattaaq siunnersuutigineqarpoq aalajangersakkamik erseqqissumik ikkussisoqassasoq, taanna malillugu tunngaviusumik inuussutissarsiummik ilinniarnerni tiguneqarnissamut tunngavittut siumoortumik lærlingitut isumaqatigiissuteqarnissaq imaluunniit

ilinniartinneqarnissamik isumaqatigiissuteqarnissaq pillugu piunasaqaat pisuni aalajangersimasuni saneqqunneqarsinnaassasoq.

1.2. Inatsisiliornissami pingaarnersiukkat

Siunnersuut aallarniutaasumik allanneqartut siumoortumik lærlingit isumaqatigiissuteqaqqaanngikkaluarluni imaluunniit ilinniartinneqarnissamik isumaqatigiissuteqaqqaanngikkaluarluni ilinniartut tunngaviummik inuussutissarsiummik ilinniarnermi inissamik qulakkeerunnissaat pillugu sulinissamut Naalakkersuisut aalajangiinerat aallaavigalugu sularineqarpoq. Aammattaaq siunnersuut tunngaviummik inuussutissarsiummik ilinniarnernut tunngasuni ingerlataqartunit attuumassuteqartuniit taamaaqataanik nalunaarutinut arlalinnut atassuteqarpoq.

Suleqatigiissitami qulaani taaneqartumi Inuussutissarsiornikkut, Suliffeqarnikkut Ilinniartitaanikkullu suliniummi - suleqatigiissitami H2-mi eqqartuinerit saniatigut apeqqut aamma KTI-mi siulersuisunit aamma Kalaallit Nunaanni Sulisitsisunit saaffiginnissutaasimavoq. Sulisitsisut tassunga atatillugu Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmut allakkani 9. september 2022-meersumi allapput sanasutut ilinniarnermik amerlanerusut aallartinnissaannut suliniutit suut aallartinneqassanersut Sanaartornermi sanasut aamma El & VVS pillugit Sulisitsisut ataatsimiititaliaani eqqartorneqarsimapput.

Tamatuma nanginnerani allanneqarpoq ataatsimiititaliap naliliinera tassaasoq nunaqarfinit minnerusuniit qinnuteqartut arlallit suliffimmik ilinniarfissamik nassaarnissamik ajornartorsiuteqartartut, tassa suliffeqarfiit ikimmata, ingerlatallu annertussusaat annertunngimmata. Allakkiamit aamma takuneqarsinnaavoq ataatsimiititaliamit taamaattumik inassutigineqartoq qinnuteqartoq suliffimmi inissamik nassaanngikkaluartoq sanasutut ilinniarnermik aallartinnissamut periarfissamik pilersitsisoqassasoq.

Allakkanit aamma takuneqarsinnaavoq apeqqut aamma qitiusumik ilinniarfinni forstanderit aamma siulersuisuni siulittaasut akornanni ataatsimoorluni ataatsimiinnermi eqqartorneqarsimasoq. Peqatigisaanik allakkamit takuneqarsinnaavoq inassutip akuerineqarnerata assigiinnassagaa ilinniartut suliatigut piginnaasaat sulinissamullu piareersimanerat qaffatsissagaat, taamaalillutik taakku suliffeqarfinnut pilerinarnerulerlutik.

Tamatuma saniatigut allanneqarpoq taamaattoqassappat ilinniartut ukiunut sisamanut taarsiullugu taamaallaat ukiunut pingasunut suliffeqarfimmi tiguneqarsinnaassasut, tamannalu ilinniarnermi inissanik amerlanerusunik pilersitsissalluni.

Kiisalu eqqaaneqarluni Ilinniartitaanermut, Kultureqarnermut Timersornermullu Naalakkersuisoqarfimmut allakkani 27. februar 2022-meersuni KTI-mit aamma allanneqarsimalluni ilinniarnermik aallartissinnaajumalluni tunngavittut suliffimmi misiliiffissaqarnissamut piunasaqaatip atorunnaarsinnissaa kissaatigalugu, immikkut

akuersinissamut periarfissap ilanngunneqarneratigut imaluunniit piumasaqaatip peerneqarneratigut. Tamatumunnga KTI-mit tunngavilersuutigineqarpoq inuusuttut ilinniarnermik aallartitsinissaannut aporfik pineqartoq.

Peqatigisaanik allanneqarsinnaavoq inatsisip allanngortissinnaaneranut isumaliutit annerusumik inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersumi, kingullermik Inatsisartut inatsisaatigut nr. 15, 12. juni 2019-imeersukkut allanngortinneqartumi § 2-p allanngortinnissaanut periarfissamut atassuteqartoq. Aalajangersagaq tassaavoq nassuiaatit pillugit aalajangersakkamik taaneqartartoq, inuussutissarsiutigut ilinniarnert suunerisa paasineqarnissaannik aalajangersaasoq. Aalajangersakkami imm. 1, oqaaseqatigiit aappaani piumasaqaataavoq lærlingitut imaluunniit ilinniartinneqarnissamik isumaqatigiissuteqartoqarsimanissaa, imatut nassuiarneqarsinnaasoq tunngaviusumik inuussutissarsiummik ilinniarnert aallartinnginnerani lærlingitut isumaqatigiissuteqarsimanissaq imaluunniit ilinniartinneqarnissamik isumaqatigiissuteqarsimanissaq. Assersuutigalugu lærlingitut isumaqatigiissuteqareersimanissaq pillugu taamatut piumasaqarneq taamaattumik tiguneqarnissamut piviusumik piumasaqaataavoq.

1.3. Siunnersuut ataatsimut isigalugu

Siunnersuutip pingaarutilittut siunertaraa siumoortumik lærlingitut imaluunniit ilinniartinneqarnissamik isumaqatigiissuteqaaqaarani tunngaviusumik inuussutissarsiummik ilinniarnermik ilinniartut aallartissinnaanerannut ammaassinissaq.

Siumoortumik lærlingitut isumaqatigiissuteqaaqaarani imaluunniit ilinniartinneqarnissamik isumaqatigiissuteqaaqaarani assersuutigalugu ukiumik ataatsimik sivilissusilimmi ilinniarfimmi tunngaviusumik ingerlanermi tunngaviusumik inuussutissarsiummik ilinniarnermik ilinniarnermik ilinniartut aallartissinnaalersillugit. Siunnersuummi nr. 4 naapertorlugu tunngaviusumik inuussutissarsiummik ilinniarniarfimmi tiguneqarnissamut piumasaqaatit suliffimmik misiliffissaq pillugu siumoortumik isumaqatigiissuteqarnissaq pillugu piumasaqaammiit immikkut ittumik periarfissaqarneq pillugu erseqqissumik malittarisassamik ikkussisoqarneratigut aalajangersakkamik nutaamik ikkussisoqarpoq. Immikkut ittumut tunngavigineqarpoq ilinniarnermi pineqartumi ilinniartinneqarnissamut pilersaarummut ilanngunneqarsimanissaa aamma ilinniarnissamut pilersaarut Naalackersuisunit akuerineqarsimassalluni. Tassunga ilanngutissaaq ilinniartinneqarnissamut pilersaarutip akuerineqarnissaanut atukkanik piumasaqaatinillu Naalackersuisut aalajangersaasinnaanerat, tassunga ilanngullugu ilinniarnertup ingerlanerani piffissami kingusinnerusumi suliffimmik misiliffissamik ilinniartup pissarsinissaa pillugu imaluunniit allatigut ilinniartup tiguneqarsimasup taamaaqataanik ingerlanissaata qulakkeerneqarnera, assersuutigalugu ilinniaatigaluni sungiusarnikkut.

Inuussutissarsiutigalugu ilinniarnep aallartinnissaanut siumoortumik lærlingit imaluunniit ilinniartinneqarnissamik isumaqatigiissuteqarnissaq pillugu tunngavik tiguneqarnissamut piunasaqaataamat Inatsisartut inatsisaanni § 2, imm. 1, oqaaseqatigiit aappaat tamatuma kingunerisaanik iluarsineqassaaq. Lærlingit imaluunniit ilinniartinneqarnissamik siumoortumik isumaqatigiissuteqarnissaq pillugu tunngavik taamaattumik aalajangersakkamit tassannga atorunnaarsinneqassasoq siunnersuutigineqarpoq.

2. Siunnersuummi immikkoortut pingaarnit

2.1. Inatsisit atuuttut

Inatsit atuuttoq tassaavoq inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersoq kingullermik Inatsisartut inatsisaatigut nr. 15, 12. juni 2019-imeersukkut allanngortinneqartoq. Inatsisartut inatsisaat inuussutissarsiutigut ilinniarnermut tunngasut iluanni malittarisassanik nalinginnaasunik imaqarpoq, tassunga ilanngullugit inuussutissarsiutinut ilinniarnep aamma inuussutissarsiutinik ilinniartitsinerup iluani pikkorissaanerit, aamma qitiusumik aamma inuussutissarsiutinut ilinniartit pillugit ilinniartinni sinaakkutinik aalajangersaalluni.

Immikkoortumi nassuiaatinik quleqtaqartumik Inatsisartut inatsisaanni § 2, imm. 1-imi, aalajangersarneqarpoq inuussutissarsiutini tunngaviumik ilinniarnep paasineqartoq paarlakaattumik ilinniarnep, taamaalilluni suliffimmiinnerup ilinniartimmiinnerullu akornanni nikerartoqarluni. Tunngaviumik inuussutissarsiutinik ilinniartitsinerup ilaapput tunngaviumik ilinniartitsissutit, ilinniartitsissutit suliamut tunngasut, ilinniartitsissutit immikkut ittut aamma ilinniartitsissutit nammineq toqqagassaajunnartut, piunasaqaataallunilu lærlingit imaluunniit ilinniartinneqarnissamik isumaqatigiissuteqartoqarsimanissaa, qinnuteqartoq ilinniaatigaluni sungiusartutut ilinnialersimangippat, tak. § 10, imm. 4.

Peqatigisaanik aalajangersakkami imm. 2-mit takuneqarsinnaavoq inuussutissarsiummik ilinniarnep allani paasineqartoq ilinniarnep inuussutissarsiutinut imaluunniit qitiusumik ilinniartimmi annerusumik ingerlanneqartut, kapitali 6 naap., atuagarsorluni ilinniartitsinerup, ilinniarnep taakku sivikinnerusumik sivilissuseqartumik suliffimmiinnerit ilanngunneqarsinnaasut. Tassunga atatillugu pineqarput ilinniartimmi tunngaveqartut ilinniarnep, paarlakaattumik ilinniarnep iluseqartillugit aaqqissuunneqarsimanngitsut, naak ilinniarnep ingerlanerani suliffimmiinnerit ilanngunneqarsinnaagaluartut. Aalajangersakkamili pineqangillat paarlakaattumik ilinniarnep assersuutigalugu ukiumik ataatsimik sivilissuseqartut ilinniartimmi tunngaviumik ingerlataqarnermik aallartinneqartut siumoortumik lærlingit imaluunniit ilinniartinneqarnissamik isumaqatigiissuteqaaqqaarnani.

Aammattaaq kapitali 3-mut qulequttamit takuneqarsinnaavoq ilinniarnep isersinnaaneq kapitalimi pineqartoq.

Inatsisartut inatsisaanni § 7, imm. 1-imit aamma takuneqarsinnaavoq inuussutissarsiummik ilinniarnermut isersinnaaneq ilinniartuup suliarisimasaani ilinniartinneqarnissamik pilersaarummi aalajangersarneqartartoq aamma inuussutissarsiutinut ilinniarnernut naalakkersuisoqarfimmit akuerineqartussaasut, taamaattorli takuuk imm. 2 aamma 4. Aalajangersakkami imm. 2-mit takuneqarsinnaavoq piumasaqaatit sorliit atorlugit ilinniartut inuussutissarsiummik ilinniarnissanut tiguneqarsinnaanerannut Naalakkersuisut malittarisassanik aalajangersaasinnaasut.

Aalajangersakkami imm. 3-mi aalajangersarneqarpoq kinaluunniit akuerisaasumik inuutissarsiummik ilinnialernissamut piareersaataasumik, naammaginartumik angusaqarluni ingerlatsisimasoq, tunngaviummik inuutissarsiummik ilinnialersinnaasoq, taamaattoq tak. imm. 4 aamma § 9.

Imm. 4-mi aalajangersarneqarpoq tunngaviummik inuutissarsiummik ilinniartitsinerit ilaanni, ilinniartut ilinniartussatut akuerisaannginnerminni, imaluunniit tunngaviummik inuutissarsiummik ilinniakkap nanginnerata ilaatut, immikkut aqqissuussamik ilinnialernissamut piareersaataasumik pikkorissarnermi angusisimanissaat pillugu Naalakkersuisut aalajangersagaliorsinnaasut.

Kiisalu § 7, imm. 5-imit takuneqarsinnaalluni inuussutissarsiummik ilinniarnernut allanut isersinnaanermut piumasaqaatit pillugit malittarisassanik Naalakkersuisut aalajangersaasinnaasut.

Tamatuma saniatigut ilinniakkat ilusaat pillugu Inatsisartut inatsisaanni kapitali 4-mi § 10, imm. 1-imit takuneqarsinnaalluni tunngaviummik inuutissarsiutinik ilinniartitsinerit paarlakaattumik ilinniarnertut aqqissuunneqassapput, ilinniarfimmiiinnerit sungiusarlunilu sulinerit paarlakaattussangorlugit. Ilinniarfimmiiinnerit inuutissarsiutinik ilinniarfinni aamma qitiusumik ilinniarfinni Naalakkersuisut akuerisaanni ingerlanneqassapput.

Aalajangersakkamut nassuiaatinit takuneqarsinnaasoq imm. 1-ip tunngaviummik inuutissarsiutinik ilinniartitsinernut immikkut ilisarnaataasoq allaaseraa, tassaasoq ilinniakkat paarlakaattumik aqqissuunneqarnerat, taamaalillunilu ilinniarfimmiiinnerit sungiusarlunilu sulinerit paarlakaallutik. Peqatigisaanik ilanngunneqarluni tamatumani aammattaaq piumasarineqarpoq lærlingitut imaluunniit ilinniartinneqarnissamik isumaqatigiissuteqartoqarsimanissaa, qinnuteqartoq ilinniaatigaluni sungiusarluni sulisussatut akuerisaasimangippat.

Aalajangersakkami imm. 2-mi aalajangersarneqarpoq inuussutissarsiutigalugu ilinniarnertut allat Naalakkersuisunit akuerineqartunik inuussutissarsiutinik qitiusumillu ilinniarfinni ingerlanneqartuni nalinginnaasumik atuagarsorluni ilinniarnertut aqqissugaasartut, ilinniarnertut siviiksumik sivisussuseqartumik ataasiakkaatigut suliffimmiiinnerik aqqissuunneqarsinnaallutik.

Aalajangersakkamut nassuiaatinit takuneqarsinnaavoq paarlakaattumik ilinniarnertut aaqqissuunneqanngitsut inuussutissarsiutigalugu ilinniarnert pineqartut, paarlattuanilli qitiusumik ilinniarfimmi ingerlanneqartumi atuagarsorluni ilinniarnertut aaqqissugaasut, taamaattorli ilinniarnerni sivikitsumik sivisussuseqartumik suliffimmiinnerit ilanngunneqarsinnaasut.

Aammattaaq imm. 3-mi aalajangersarneqarluni ilinniarkinna allani, ilinniarkinna suliffeqarfinnilu ingerlanneqartut inuussutissarsiummik ilinniarnert Naalakkersuisunit akuerineqartussaasut. Inuussutissarsiummik ilinniarnert aalajangersimasut aalajangersagaq naapertorlugu Naalakkersuisut akuersinerat tunngavigalugu inatsimmi pineqartuni inuussutissarsiutinut aamma qitiusumik ilinniarkinnaunngitsoq ilinniarkinna ilinniarkinna allani ingerlanneqarsinnaassapput imaluunniit suliffeqarfinni namminersortumi. Taamaalilluni aalajangersakkap periarfissippaa, suliffeqarfiit namminersortut inuutissarsiutinik ilinniartitsinissamut akuerineqarsinnaanerat.

Kiisalu aalajangersakkami imm. 4-mit takuneqarsinnaalluni aaqqissuussinerit ingerlanneqarsinnaasut, suliffimmiilluni ilinniarneq ilinniarkinna suliffimmi misiliinertut ilinniarkinna ingerlanneqarsinnaasooq, tamannalu pillugu Naalakkersuisut malittarisassanik aalajangersaasinnaasut.

Aammattaaq tunngaviusumik inuussutissarsiummik ilinniarnertup ilusaa atuuttoq Ilinniartunut inatsisitigut pissutsit pillugit Inatsisartut inatsisaanni kapitali 8-imi § 46-miit aallaaveqarluni, tassani ilinniartup suliffiullu suliffimmik misiliiffiusup akornanni pissutsit pillugit malittarisassaqaqtitsisoq. Aalajangersagaq Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanert pillugit Inatsisartut inatsisaata allanngortinneqarneranik Inatsisartut inatsisaat nr. 6, 16. juni 2016-imeersumi allanngortinneqarpoq.

Tassunga atatillugu § 46, imm. 1-imi allassimavoq tunngaviusumik inuutissarsiummik ilinniagaq naammassineqassappat piumasaavoq, ilinniartup aamma suliffeqarfiup ataatsip amerlanerilluunniit akornanni lærlingit imaluunniit ilinniartinneqarnissamik isumaqatigiissuteqartoqarsimanissaa.

Aammattaaq aalajangersakkami imm. 2-mi oqaaseqatigiinni siullerni aalajangersarneqarluni lærlingit imaluunniit ilinniartinneqarnissamik isumaqatigiissummut ilaassapput ilinniakkami sungiusarluni sulinissat ilinniarkinnaittarnissallu tamarmik, tassunga ilanngullugit svendinngussalluni misilitsinnerujunnarnert. Aalajangersakkami lærlingit imaluunniit ilinniartinneqarnissamik isumaqatigiissut sunik imaqassanersoq allaqqavoq. Aalajangersakkami oqaaseqatigiit aappaanni aalajangersarneqarpoq qitiusumik imaluunniit inuussutissarsiutigalugu ilinniarkinnaitt tamanna pillugu qinnuteqartoqarneratigut oqaaseqatigiinni siullerni piumasaqaammit Naalakkersuisut immikkut akuersisinnaasut.

Tamatuma assigiinnarpaa immikkut akuersisoqarsinnaasoq, taamaalilluni ilinniartup suliffimmiinnissaralua ilinniarfimmi suliffimmi misiliinertut ingerlassinnaagaa, ilinniartup suliffimmi misiliinnginnerit ilinniaatigaluni sungiusarnertut ingerlassinnaagai ilinniarfiup uppersarsinnaappagu taamaalillunilu qulakkeerlugu. Kiisalu imm. 2-mi oqaaseqatigiinni kingullerni aalajangersarneqarluni ilinniartut ilinniarfimiinnerminni ilinniarnissamut isumaqatigiissuteqaratik, tassunga ilanngullugu ilinniaatigaluni sungiusarneq, sulisitsisumiit akissarsiaqaratik tunngaviumik inuussutissarsiummik ilinniarnermi ilinniartut isigineqartoq. Tamatumani aalajangersakkamut nassuiaatit naapertorlugit siunertaavoq ilinniagaqarnersiutinut naleqqiullugu ilinniartut taakku inissisimanerinek erseqqissaaneq, tamatumalu assigalugu pisuni aalajangersimasuni ilinniagaqarnersiuteqarsinnaasut.

Aammattaq § 46, imm. 3-mit takuneqarsinnaavoq isumaqatigiissummi suliffeqarfiit arlallit peqataappata ilinniarfimiinnerit aamma suliffimmiinnerit suut suliffeqarfimmit ataatsimit peqataaffigineqarneri isumaqatigiissummit takuneqarsinnaassasoq. Tamatuma saniatigut imm. 4-mi aalajangersarneqarpoq isumaqatigiinnermi suliffeqarfik imminut pisussaaffilersinnaavoq, ilinniartup ilinniarnerrata ilaa suliffeqarfimmi allami ingerlatsikkumallugu imaluunniit ilinniaatigaluni sungiusarnertut. Kiisalu imm. 5-imit takuneqarsinnaalluni inuutissarsiummik ilinniartitsinerit Naalakkersuisunit akuerisaasut, lærlingit ilinniartinneqarnissamilluunniit isumaqatigiissuteqarnissamik piunasaqaateqarfiunngitsut aamma ilinniaatigaluni sungiusarluni sulineq, imm. 1-4-mi ilaatinneqanngillat.

2.2. Siunnersuut

Siunnersuutigineqarpoq tunngaviumik inuussutissarsiummik ilinniarnerrup aallartinnissaa sioqqullugu lærlingit isumaqatigiissuteqarnissaq imaluunniit ilinniartitaanissamik isumaqatigiissuteqarnissaq pillugu piunasaqaat Inatsisartut inatsisaanni § 2, imm. 1. oqaaseqatigiit aappaanni atorunnaarsinneqassasoq, tassa § 2 tassaamat nassuiaatit pillugit aalajangersagaq. § 2, imm. 1, oqaaseqatigiit aappaata allannortinneratigut erseqqissaasoqarpoq, tamatuma kingorna tamanna pillugu aalajangersagaq erseqqissoq tunngavigalugu pisoq malittarisassaqartinneqarluni ilinnialernissaq pillugu malittarisassanut Inatsisartut inatsisaanni kapitali 3-mut ikkunneqarluni.

Tassunga atatillugu kapitalip aamma isersinnaaneq pillugu malittarisassat ilaalernerit allanniarlugu kapitali 3-mut qulequttamut ilanngussisoqarpoq.

Tunngaviumik inuussutissarsiummik ilinniarnissamut piunasaqaat siunnersuutim lærlingit isumaqatigiissuteqareersimanissaq imaluunniit ilinniartinneqarnissamut isumaqatigiissuteqareersimanissaq pillugu inatsimmi aallaavigineqartoq taamaalilluni Inatsisartut inatsisaanni § 7-mi imm. 4-mi nutaatut ikkunneqarluni ingerlateqqinneqarpoq, tassani pineqarluni inuussutissarsiutinut ilinniarnernut isersinnaaneq tiguneqarsinnaanerlu pineqarlutik.

Aammattaaq inuussutissarsiutinut tunngaviusumik ilinniarnermi tiguneqarnissamut piumasaqaatit suliffimmik misiliffissaq pillugu siumoortumik isumaqatigiissuteqarnissaq pillugu piumasaqaammiit erseqqissumik ilanngunneqannginnerup ikkunneqarnissaa siunnersuutigineqarluni. Ilinniarnerni aalajangersimasuni ilinniarnermi suliffimmik misiliinertaa ilinniarnermi piffissami kingusinnerusumi ingerlannissaa aalajangersakkami periarfissaalerpoq. Aalajangersakkami akerlianik assersuutigalugu EFG-mi ukiup tunngaviusup eqqunneqarnissaa pineqanngilaq, tak. tamanna pillugu malittarisassat, tassunga pingaartumik taamanikkut atuuttumi Kalaallit Nunaanni tunngaviusumik inuussutissarsiummik ilinniarneq pillugu Inatsisartut peqqussutaat nr. 5, 24. Oktober 1980-imeersumi § 4. Taamanikkut atuuttuni malittarisassani suliffeqarfimmi attaveqarnissaq sioqqullugu ilinniartitsissutit assigiinngitsut misiligarnissaannut periarfissaqartoq nalinginnaasumik ukioq tunngaviusoq pineqarpoq.

Taamaattorli immikkoortoq 1.3-mi qulaani allanneqartut lærlingit imaluunniit ilinniartinneqarnissamik siumoortumik isumaqatigiissuteqarnissaq pillugu piumasaqaammit immikkut akuersinissamut nalinginnaasumik periarfissaq pineqanngilaq. Ilinniartup taamaattumik aalajangersakkamut innersuussilluni ilaatitsinnginneq pillugu aalajangersakkap malitsigisaanik siumoortumik lærlingit imaluunniit ilinniartinneqarnissamik isumaqatigiissuteqarnani tunngaviusumik inuussutissarsiummik ilinniarnermi tiguneqarnissaq piumasarinnaanngilaa. Ilanngunneqanngitsoq taamaattumik taamaallaat piviusunngortinneqarsinnaavoq tamanna ilinniarnermut pineqartumut ilinniarnissamut pilersaarummut ilanngunneqareersimappat. Peqatigisaanik ilinniartinneqarnissamik pilersaarut Naalakkersuisunit akuerineqarsimassaaq, akuersinermut atatillugu atukkanik piumasaqaatinillu aalajangersaasinnaasut, tassunga ilanngullugu ilinniarnernup ingerlanerani piffissami kingusinnerusumi ilinniartuup suliffimmi misiliffissamik pissarsinissaa allatigulluunniit ilinniartut tiguneqarsimasut taamaaqataanik allatsigut ingerlatsinissaannik qulakkeerisoqarluni, assersuutigalugu ilinniaatigaluni sungiusarnikkut. Ingerlanermi kingusinnerusumi suliffimmik misiliffissamik nammineq nassaarsinnaannginneq pissutigalugu ilinniartut unitsitsisarnerat pinngitsoortinniarlugu tamanna tunngavittut pingaaruteqartut ilaavoq.

Kiisalu takuneqarsinnaalluni siunnersuut ulloq 1. august 2023-mi atuutilissasoq. Piffissaq atuutilerfissaa ilaatitsinnginnerup piaartumik atulersinnissaa pillugu kissaateqarnek aallaavigalugu aalajangersarneqarpoq, peqatigisaanik piumasarineqarluni ilinniarnissamut pilersaarutini pisariaqartumik malittarisassaliornissaq taakkulu kingornatigut Naalakkersuisunit akuerineqarlutik.

3. Pisortanut aningaasaqarnikkut allaffissornikkullu malitsigisinnaasai

Siunnersuut pisortanut aningaasaqarnikkut imaluunniit aqutsisoqarnikkut sunniteqassanngitsutut naatsorsuutigineqarpoq.

Siunnersuutip aningaasaqarnikkut kingunissaali piffissami kingusinnerusukkut

sunniuteqalersinnaapput, ilinniartinneqarnissamik pilersaarutip akuerineqarnerata malitsigisaanik ilinniarfik, tunngaviusumik ingerlatsinermi, suliffimmik misiliiffissamik isumaqatigiissummik qulakkeerinnissimangitsunik ilinniartunik amerlanernik tigusaqarpat. Tassunga atatillugu aningaasaqarnikkut kingunissai ilinniartut qaavatigut qanoq amerlatigisut ilinniarfiup piginnaasai aallaavigalugit taamaattoqartillugu tiguisinnaanera pillugu apeqqummut atassuteqassapput. Tassunga atatillugu naliliisoqarpoq siullermik KTI aamma INULI piginnaasanik atorneqanngitsunik peqartuusut, taamaattumillu siumoortumik suliffimmik misiliiffissamik isumaqatigiissuteqarnissaq pillugu piumasaaqat saneqqunneqarsinnaappat ilinniartunik amerlanerusunik tiguisinnaassapput.

KTI-mit eqqaaneqarsimavoq naliliillutik inatsimmik allannguisoqarpat sanasutut ilinniarfimmil ilinniaqatigiinnik amerlanerusunik suli pilersitsisinnaallutik aamma lærlingitut isumaqatigiissuteqaqqaarnani maannakkut vvs-itut qalipaasutullu ingerlatsisussanik ilinniartunik tiguisinnaallutik. Tamatuma nanginnerani KTI allappoq annertunerpaamik piginnaasanik atuinerup assigissagaa KTI ilinniartunik suli allanik 30-nik tiguisinnaassasoq. KTI-mi ilinniartunut ineqarfinni piginnaasat pillugit apeqqummut naleqqiullugu taamaattoq naatsorsuutigineqarpoq ilinniartunut ineqarfinni qaavatigut inissanik 30-nik pisariaqartitsineq KTI-mi ilinniartunut ineeqqat pilersaarutaasunit 72-init naammassineqarsinnaassasoq, iliniartunut ineqarfiit pillugit ingerlataqarfimmi pilersaarummi ilanngunneqartussatut naatsorsuutigineqartumi.

Tassunga atatillugu KTI-mut aningaasaqarnikkut kingunissanut ingerlatat naapertorlugit malittarisassanut ilaatinneqassasut naatsorsuutigineqarpoq, ilinniartitsisunut aningaasartuutissat aamma tassani ilaatinneqarlutik. Tamanna ilinniaqatigiinnut sapaatit akunnerinik 40-inik annertussuseqarpoq, aningaasanut inatsit aallaavigalugu sapaatit akunneranut ataatsimut ingerlatat naapertorlugit akigitat aalajangersarneqarsimasut aningaasartutit ukiumut 1.100.000 kr.-nik qaffannerinik kinguneqassalluni.

Ilinniartut 30-it eqqaaneqartut peqatigisaannik inuussutissarsiummik ilinniarnerni ilinniartunut qaammammut 4.834 kr.-nik ilinniagaqarnersiuteqartussaassapput, taanna tassaalluni akitigut akissarsiatigullu naleqqussarneqartoq 2023-mut akigititaq. Tamatuma kingunerissavaa ukiup ataatsip ingerlanerani ilinniartunut 30-nut eqqaaneqartunut ilinniagaqarnersiutit 1.740.240 kr.-nik ataatsimut aningaasartuutit.

Ilinniartut akerlianik sulisitsisumiit akissarsiaqartinneqarpata soorunami ilinniagaqarnersiutinut taamatut aningaasartuuteqassanngilaq, taamaattoqarpalli ilinniartumut ataatsimut qaammammut ataatsimut 4.525 kr.-nut lærlinginik atorfinitsitsinermut atatillugu sulisitsisunut tapiissuteqarnikkut ilinniagaqarnersiutitigut aningaasartuuteqassaaq, taanna tassaalluni akitigut akissarsiatigullu naleqqussarneqartoq 2023-mut akigititaq. Tamanna sulisitsisunut 1.629.000 kr.-nik ilinniagaqarnersiutitigut ataatsimut aningaasartuuteqarfiussaaq.

Ilinniartunut taamaaqataanik amerlassuseqartunut sulisitsisunut ilinniagaqarnersiutitut taarsiullugu inuussutissarsiutitut ilinniarnermi ukiumut ilinniartunut 30-nut ilinniagaqarnersiutitini 111.240 kr.-nik annertunerusumik aningaasartuuteqarfiusaaq. Taamatut naatsorsuineq taamaallaat ilimagisaannaavoq, tassa inuussutissarsiummik ilinniarnermi ilinniartunut saniatigut 30-nik atorfinitsitsinermut atatillugu sulisitsisunut ilinniagaqarnersiutit suliffimmi misiliiffissanik 30-nik piumasaqarmat. Siunnersuut tassunga atatillugu suliffimmi misiliiffissanik naammattunik amerlassuseqartunik siumoortumik pilersitsisinnaanerup ajornarneranik pilersinneqarpoq.

INULI eqqarsaatigalugu naatsorsuutigineqarpoq ilinniartut 15-20-t missaaniittut siumoortumik suliffimmi misiliiffissaqarnani ukiumi ataatsimi tunngaviummik ingerlatsinermi aallartissinnaassapput, taamaalilluni ilinniarfiup piginnaasai tamakkiisumik iluaqutigineqarlutik. Tassunga atatillugu naatsorsuinerni ilinniaqatigiit ataatsit sapaatip akunneranut ingerlatat naapertorlugit akigititami 37.500 kr.-t pineqarput, sapaatit akunnerinut 40-nut 1.500.000 kr.-nik annertussuseqartussat. Taakkununga ilanngutissapput ilinniartunut pineqartunut 20-nut ilinniartumut ataatsimut qaammammut ataatsimut ilinniagaqarnersiutit 4.834 kr.-t. Tamanna ilinniagaqarnersiutitut aningaasartuutitini 1.160.160 kr.-nik ukiumut annertussuseqassaaq.

Kingunissalli eqqaaneqartut taamaallaat piviusunngorsinnaapput ilinniarfeqarfiit sioqqutsisumik § 5, imm. 3, tak. 7 a, imm. 1, nr. 2 naapertorlugu ilinniartinneqarnissamik pilersaarusiorsimappata nassiussisimappatalu, taakkulu kingorna akuerineqarsimappata. Peqatigisaanillu tamatuma kingunerissallugu lærlingimik atorfinitsitsinermut atatillugu akissarsianut aningaasartuutitut ilinniartumut ataatsimut qaammammut ataatsimut 4.525 kr.-nik tapiissuteqarnikkut sulisitsisunut ilinniagaqarnersiutit aningaasaliisoqartussaanani.

Peqatigisaanik oqaatigineqassaaq inatsimmik allannguinerup kingunerisussaassallugu qitiusumik ilinniarfik tunngaviatigut ilinniarnernup assinganik neqerooruteqarnissaa, taamaattorli ilinniarnernup ukua siulleq eqqarsaatigalugu assigiinngitsunik ingerlanneqartussaaq. Ilinniarneq pineqartoq taamaalilluni ilinniartunut lærlingit imaluunniit ilinniartinneqarnissamik isumaqatigiissuteqarsimasunut ileqqusumik paarlakaattumik ilinniarnertut ingerlanneqarsinnaassaaq, peqatigisaanik ilinniartunut lærlingit imaluunniit ilinniartinneqarnissamik isumaqatigiissuteqarsimanngitsunut ilinniarneq aallarniutaasumik tunngaviummik ingerlanertut ingerlanneqarluni. Pissutsini taakkunani naatsorsuutigineqarpoq ingerlanernik assigiinngitsunik marlunnik isumaginninnermut tunngatillugu tamanna qitiusumik ilinniarfimmu allaffissornikkut suliassaqartitsinermik kinguneqassaaq.

Aammattaaq siunnersuutip kingunerissallugu qitiusumik ilinniarfimmu naleqqiullugu allaffissornikkut ilungersunartoqassaaq, siunnersuut tunngavigalugu siumoortumik lærlingit imaluunniit ilinniartinneqarnissamik isumaqatigiissuteqarnissaaq pillugu piumasaqaateqanngitsumik tunngaviummik inuussutissarsiummik ilinniarnermik

neqerooruteqarniarluni aalajangiisoq. Qitiusumik ilinniarfik pineqartoq taamaalilluni aallarniutaasumik tunngaviusumik ingerlataqarfiusumik ilinniartinneqarnissamik pilersaarutip akuerineqarneranut atatillugu ingerlanermi kingusinnerusumi ilinniartut pineqartut suliffimmik misiliiffissamik qulakkeerinninnissaannut pisussaaffeqalissasoq imaluunniit taamaaqataanik ingerlanissamut ilinniartut tiguneqartut allatigut qulakkeerneqarlutik, assersuutigalugu ilinniaatigaluni sungiusarnikkut. Qitiusumik ilinniarfik pineqartoq taamaattumik ingerlatassat pisariaqartut qanoq aaqqissuunnissaannut pilersaarusiorsimassaaq, tassaniilluni suliaqarfinnik aalajangersimasumik isumaqatigiissuteqarsinnaaneq, tassunga ilanngullugit suliffeqarfiit suliffinnik misiliiffiusut. Tamatuma nanginnerani oqaatigineqassaaq aningaasaqarnikkut allaffissornikkullu kingunissat eqqaaneqartut taamaallaat piviusunnorsinnaammata, ingerlanermi kingusinnerusukkut suliffimmik misiliiffissamik nammineq nassaarsinnaanginnerat pissutigalugu ilinniartut ilinniarnerminnik unitsitsinissaat pinngitsoortinniarlugu tunngavimmik pingaaruteqartumik sillimaniartuimik ilinniarnissamut pilersaarummik akuersisoqassappat.

4. Inuussutissarsiortunut aningaasaqarnikkut allaffissornikkullu malitsiginnaasai

Tunngaviusumik ingerlatsinerup naammassineqarnera nalilerneqarpoq lærlinginik atorfinitsitsineq pillugu apeqqummut tunngatillugu inuussutissarsiortut pisariaqartitaat pitsaanerusequmik akueriniarlugit ilinniartut suliatigut inuttullu piareersarneqarsinnaasut. Tamanna aamma naatsorsuutigineqarpoq ilinniartussanik amerlanerusunik kinguneqassasoq, taamaalilluni suliffeqarfiup aalajangersimasup ataatsip pisariaqartitaanut naapertuuttumik ilinniartunik atorfinitsitsinissamut periarfissat qaffannerinik inuussutissarsiortut qulakkeerneqarlutik. Tassunga aamma atatillugu naatsorsuutigineqarpoq tunngaviusumik ingerlataqarneq tassungalu atasut ilinniartitsinerit inerinnerillu ilinniartuni piginnaasanik nukittorsaassasut, taamaalillutik suliffeqarfiup ingerlataani sukkanerusequmik ilaalersinnaallutik sulisitsisumullu naleqartitsilerlutik. Aammattaaq siunnersuutip kingunerisinnaallugu lærlinginut akissarsiatigut aningaasartuutininut naleqqiullugu aningaasartuuteqarnerusinnaaneq, assersuutigalugu ilinniarnerp ukiuani siullermi akissarsiaqarluni suliffimmiinnermut taarsiullugu tunngaviusumik aallarniutaasumik ingerlataqarnermut atatillugu ilinniagaqarnerisuteqarlutik. Tassunga atatillugu sipaarummut ilaapput akissarsiat isumaqatigiissutaasut aamma sulisitsisumut ilinniagaqarnerisutit akornanni nikingassutaasut, lærlingimik atorfinitsitsinermut atatillugu ilinniartumut ataatsimut qaammammut ataatsimut 4.525 kr.-nik akissarsianut aningaasartuutininut tapiissutit.

5. Avatangiisinut, pinngortitamut inuillu peqqissusaannut kingunerisinnaasai

Siunnersuut avatangiisinut pinngortitamullu sunniuteqassanngilaq.

6. Innuttaasunut kingunerisinnaasai

Siunnersuutikkut naatsorsuutigineqarpoq tunngaviusumik inuussutissarsiummik ilinniarnermik aallartitsisinnaasut innuttaasut amerlanerulersinnaasut. Ilinniartut tunngaviusumik ingerlataqarnikkut suliatigut inuttullu piginnaasaat qaffassapput, tassunga ilanngullugit taakku suliffeqarfinnut piareersimaneri, taamaalillutik suliffeqarfinnut

naleqqiullutik pilerinarnerulerlutik taamaalillutillu tunngaviusumik ingerlatap naanerata kingorna akissarsiaqarlutik suliffimmik misiliiffissamik pissarsillutik.

Tamatuma saniatigut siunnersuut pingaartumik sumiiffinni pineqartuni suliffeqarfiit ikinneri ingerlatallu qaffasissusii pillugit apeqqut pissutigalugu ilinniarfissamik nassaarnissamut ajornarfiusinnaasuni sumiiffinnit mikinerusuneersunut ilinniartunut naleqqiullugu iluaqutaasumik sunniuteqartussaalluni.

Kiisalu oqaatigineqassalluni taamaattoqassappat ilinniartut lærlingitut akissarsiatik malunnartumik appasinnerusumik qaammammut ilinniagaqarnersiutinik taarsertussaassallugit. Tassunga atatillugu avaqqunneqarsinnaassanngilaq ilinniarnermi ukiumi siullermi ilinniartut aningaasaqarnerat pillugu apeqqut taanna pineqartup ilinniakkamik toqqaanissaanut sunniuteqarsinnaassasoq.

7. Kingunerisinnaasai pingaarnerit allat

Inatsisissatut siunnersuut allatigut pingaarutilinnik kinguneqassanngilaq.

8. Pisortanik aamma kattuffinnik il.il. tusarniaaneq

Siunnersuut piffissami 3. januar 2023-mit 31. januar 2023 tikillugu tusarniutigineqarsimavoq. Tusarniaaneq pillugu ilanngussaq 2 innersuussutigineqarpoq.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Aalajangersagaq tassaavoq Inatsisartut inatsisaanni atuuttumi § 2, imm. 1-ip oqaasertaata allangortinnera, taamaalilluni aalajangersakkami oqaaseqatigiit aappaanni aappaat pingajuallu atorunnaarsinneqarlutik. Tamatuma kingorna aalajangersakkamit takuneqarsinnaassaaq tunngaviusumik inuussutissarsiummik ilinniarnissamut piumasaqaat lærlingitut isumaqatigiissuteqareersimanissaq imaluunniit ilinniartitaanissamut isumaqatigiissuteqareersimanissaq, qinnuteqartoq ilinniarfimmi suliffimmi misiliinissamut ilanngussimangippat, tak. § 10, imm. 4.

§ 2, imm. 1 taamaattumik siunissami taamaattumik nassuiaanermi aalajangersakkatut iluseqassaaq, ilinnialernissamut piumasaqaatit ilaanatik.

Nr. 2-mut

Tunngaviusumik inuussutissarsiummik ilinniarnermi tiguneqarnissamut tunngasup siunnersuummi nr. 4-p aamma 5-ip ikkunneqarnerisa kingunerisaatut kapital 3-mi qulequttamut "akuerisaanissaq" ilanngunneqarpoq, Inatsisartut inatsisaanni atuuttumi taamaallaat ilinnialernissamut tunngasuusimasoq.

Nr. 3-mut

Tassani pineqarpoq siunnersuummi nr. 4-p kingunerisaanik iluarsineq, tamatuma kingunerisaanik § 7-mi siunissami imm. 1-6-iulerlutik.

Nr. 4-mut

Aalajangersagaq nutaajuvoq.

§ 7, imm. 4-mi isersinnaanermut erseqqissumik piumasaqaatitut aalajangersarneqarpoq tunngaviusumik inuussutissarsiummik ilinniarnissamut piumasaqaataasoq qinnuteqartup tiguneqarnissaa sioqqullugu atsiorneqarsimasumik lærlingitut isumaqatigiissuteqariissasoq imaluunniit ilinniartinneqarnissamik isumaqatigiissuteqariissasoq. Aalajangersakkap oqaasertai Inatsisartut inatsisaanni atuuttumi § 2, imm. 1-imi oqaaseqatigiit aappaasa pingajuisalu allangortillugit oqaasertalerneqarput. Erseqqissarneqarpoq tiguneqarnissaq sioqqullugu lærlingitut isumaqatigiissut imaluunniit ilinniartinneqarnissamik isumaqatigiissut atsiorneqarsimassasoq.

Aammattaaq nassuiaatini nalinginnaasuni aalajangersakkat pillugit erseqqissaatigineqartut innersuussutigineqarput.

Nr. 5-imut

Aalajangersagaq nutaajuvoq. Tassani pineqarpoq siunnersuummi nr. 4-mi isersinnaanermut piumasagaatit erseqqissumik aalajangersarneqarsimasoq Naalakkersuisunit saneqqunneqarsinnaasoq.

Siullermi § 7 a, imm. 1, nr. 1-imi immikkut akuersinissamut periarfissami § 10, imm. 4-mut innersuussisoqarpoq, tassani pineqarluni ilinniarfimmi suliffimmi misiliineq. Taamaalilluni suliffimmik misiliineq paasineqarluni lærlingitut isumaqatigiissut tunngavigalugu suliffeqarfimmut taarsiullugu ilinniarfimmi ingerlanneqartoq. Ilinniarnermut aalajangersimasumut ilinniartitaanermut pilersaarummi aalajangersarneqartut ilinniarnermut malittarisassat naapertorlugit ilinniaatigaluni sungiusarneq ingerlanneqarsinnaavoq. Tamatuma saniatigut ilinniaatigaluni sungiusarneq pillugu apeqqtut tamanna ilinniartumut tutsinneqanngikkaluarluni lærlingitut isumaqatigiissut imaluunniit ilinniartinneqarnissamut isumaqatigiissut tassanngaannartumik atorunnaarsinneqarpat atuutilersinnaavoq, peqatigisaanillu suliffimmi misiliineq ilinniaatigaluni sungiusarnertut ingerlanneqarsinnaaneranik ilinniarfik ilinniartumut neqerooruteqarsinnaalluni. Tassunga atatillugu imarisaatigut ilinniaatigaluni sungiusarnertut ingerlanneqartuni ilinniarnert pillugit aqqissuussinermik atuuttumik nangitsineq pineqarpoq.

Siunnersuutip pingaarnertut siunertaa nutaamillu pilersitsineq akerlianik § 7, imm. 1, nr. 2-mit takuneqarsinnaavoq, aalajangersakkami nr. 1 assigalugu Naalakkersuisut § 7, imm. 4-mik qanoq saneqqussisinnaaneranik aalajangersaasoq.

§ 7 a, imm. 1, nr. 2-imi, taamaalilluni pineqarpoq ilinniaatigaluni sungiusarnertut ingerlanneqartussaannngitsumik inuussutissarsiutinut ilinniarneq pineqarluartoq ilinniarnertup lærlingitut imaluunniit ilinniartinneqarnissamik isumaqatigiissuteqarnani aallartinneqarsinnaaneranik siumoortumik aalajangersinnaaneq. Aalajangersakkami taamaalilluni assersuutigalugu ukiumi ataatsimi tunngaviumik ingerlataqarnermik aallartinneqartumik suliffeqarfimmi misiliinermut taarsiullugu ilinnialersinnaaneq periarfissaalerpoq. Aalajangersakkap assingaa taamaattoqarpoq ilinniarnertup aalajangersimasup ukuanit siullermi suliffimmik misiliinermut tunngasortaa ilinniarnertup ingerlaneranut kingusinnerusumut nuunneqarnera.

Aalajangersakkap assiginngilaa suliffimmik misiliineq pillugu isumaqatigiissuteqarnissamik piumasagaat inuussutissarsiutinut ilinniartitaanermut peerneqarnera, kisiannili kinguneralugu ilinniarnertup ingerlaneranik kingusinnerusumi ilinniartoq suliffimmik misiliineq pillugu isumaqatigiissuteqarsinnaasoq, taamaattumik suliffimmik misiliineq pillugu isumaqatigiissuteqarnissamut piumasagaat suli atuulluni. Suliffeqarfimmi suliffimmik misiliinertup ingerlaneranik aatsaat ilinniarnertup kingusinnerusumi ingerlanneqartussaassaaq.

§ 5, imm. 3-mut, innersuussinertit assigiinnarpaa imm. 1, nr. 2, malillugu akuersineq ilinniarnermut pineqartumut ilinniarnissamut ilinniarfiup pilersaarusiaanik Naalakkersuisut akuersinernut atatillugu pisussaassaaq. Aalajangersakkamik takuneqarsinnaavoq ilinniakkat

akuerinissaannut piumasaasoq, ilinniartitsinermut pilersaarutit aamma ilinniakkap aaqqissugaanerata allaaserinera naammassisamik suliarineqareerlutik Naalakkersuisunit tiguneqarnissaat. Innersuussinermi erseqqissarneqarpoq § 7, imm. 4-mik saneqqussineq ataqatigiinnerit attuumassuteqartut tamaasa peqataatillugit sulineq suliarilluagaasoq aaqqissugaasorlu aallaavigalugu pisoq. Aalajangersagaq malillugu § 7, imm. 4-mi, pingaarnertut malittarisassamik saneqqussisinnaaneq ilinniarfimmi ilinniartitsinertalimmik tunngaviumik ingerlatsinermi tassanngaannartumik pisariaqartitsisoqalernera tunngavigalugu immikkut akuerineqarnissamik qinnuteqaatip nassiunneqaannarneratigut taamaattumik atorneqarsinnaanngilaq.

Siunnersuummut tusarniaatigineqartumut atatillugu aalajangersakkap oqaaseqatigiivisa siullianni ”-sinnaapput” peerlugu ”-ssapput”-mik taarserneqassaaq. Akuerineqarnissamut piumasaqaatit ilinniarfiup aalajangersagai Naalakkersuisunit imm. 1, nr. 2 naapertorlugu akuerineqartussat atuartup naammassippagit atuartup immikkut akuerineqarnermut atatillugu inuussutissarsiutinik ilinniarfinnit akuerineqarnissaanuttaaq naatsorsuuteqarnermik allannguut ersersitsissaaq.

Aalajangersakkami imm. 2 qanoq § 7, imm. 4-mik saneqqussisinnaanermut Naalakkersuisut piumasaqaateqarsinnaanerinut periarfissiivoq. Tassunga atatillugu ilinniaatigaluni sungiusarnermut naleqqiullugu, tak. imm. 1, nr.1, aamma ilinniarnernut siumoortumik lærlingitut isumaqatigiissuteqaqqaarnani imaluunniit ilinniartinneqarnissamut isumaqatigiissuteqaqqaarnani tiguneqarnissamut piumasaqaatinik aalajangersaavoq.

Aalajangersagaq aamma siumoortumik suliffimmik misiliinissamut isumaqatigiissutip qulakkeerneqarnissaanut pisussaaffiup saneqqunneqarnissaanut imm, 1 nr. 2-mut, tunngatillugu atorneqarsinnaavoq. Tamatuma malitsigisaanik imm. 1, nr. 2, malillugu akuersineq ilinniarfiup piumasaqaatinik erseqqinnerusumik aalajangersarneqarsimasunik naammassisaqarnissaanik Naalakkersuisut piumasaqarsinnaapput. Tassani pineqarsinnaapput lærlingitut imaluunniit ilinniartinneqarnissamik isumaqatigiissuteqarnatik tiguneqartut ilinniartut ilinniarnernup ingerlanerani kingusinnerusukkut lærlingitut imaluunniit ilinniartinneqarnissamik isumaqatigiissukkut qanoq qulleerunneqarsinnaanerinik ilinniarfiup qulaajaanera. Tamanna assersuutigalugu lærlingitut isumaqatigiissut pillugu piumasaqaat qanoq naammassineqarnissaanut pilersaarusiornikkut pisinnaavoq. Aammattaaq ilinniarnernup neqeroorutiginnissanut pisariaqartumik piginnaasaqarnermik ilinniarfeqarfiup uppernaaanissaa pillugu piumasaqaatinik piumasaqartoqarsinnaavoq, tassunga ilanngullugit ilinniartitsisunut, ininut, atortunut, ilinniartunut ineqarfinni inissanut il.il. tunngatillugu.

§ 2-mut

Aalajangersakkami siunnersuutip atuutilerfissaa allanneqarpoq.

Piffissaq atuutilerfissaq ulloq 1. august 2023-mut aalajangersarneqarpoq akuersinerup kinguninnguatigut inatsisip atuutlernissaa siunertaralugu.

Ilanngussaq 1

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Inatsisissatut siunnersuut</i>
	§ 1 Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersumi, Inatsisartut inatsisaatigut nr. 3, 4. juni 2012-imeersukkut, nr. 6, 6. juni 2016-imeersukkut aamma nr. 15, 12. juni 2019-imeersukkut allanngortinneqartumi imatut allannguisoqarpoq:
<p>§ 2. Tunngaviusumik inuutissarsiutinik ilinniartitsineq tassaavoq paarlakaattumik ilinniarneq, sungiusarluni sulinerup ilinniarfimmiinnerullu paarlakaaffigisaat. Tunngaviusumik inuutissarsiutinik ilinniartitsinermut ilaapput tunngaviusumik ilinniartitsissutit, ilinniartitsissutit suliamut tunngasut, ilinniartitsissutit immikkut ittut aamma ilinniartitsissutit nammineq toqqagassaajunnartut, piumasaqaataallunilu lærlingitut imaluunniit ilinniartinneqarnissamik isumaqatigiissuteqartoqarsimanissaa, qinnuteqartoq ilinniaatigaluni sungiusartutut ilinnialersimangippat, tak. § 10, imm. 4.</p>	<p>1. § 2, imm. 1, imatut oqaasertalerneqarpoq: " Tunngaviusumik inuutissarsiutinik ilinniartitsineq tassaavoq paarlakaattumik ilinniarneq, sungiusarluni sulinerup ilinniarfimmiinnerullu paarlakaaffigisaat. Tunngaviusumik inuutissarsiutinik ilinniartitsinermut ilaapput tunngaviusumik ilinniartitsissutit, ilinniartitsissutit suliamut tunngasut, ilinniartitsissutit immikkut ittut aamma ilinniartitsissutit nammineq toqqarneqarsinnaasut,"</p>
<p>Kapitali 3 <i>Ilinnialernissamut piumasaqaatit</i></p>	<p>2. Kapitali 3-mut qulequtaq imatut oqaasertalerneqassaaq: <i>"Ilinnialernissamut piumasaqaatit akuerisaanerlu"</i></p>
<p>§ 7. Inuutissarsiutinik ilinnialernissamut piumasaqaatit ilinniarfiit ilinniartitsinermut pilersaarusaanni aalajangersarneqassapput, inuutissarsiutinillu ilinniartitsinermut naalackersuisoqarfimmit</p>	<p>3. § 7, imm. 1-imi "imm. 2-4" imatut allanngortinneqassaaq: "imm. 2-5".</p>

akuerineqassallutik, taamaattoq tak. imm. 2-4.	
	<p>4. § 7-mi imm. 3-p kingorna immikkoortut nutaatut ilanngunneqassaaq: " <i>Imm. 4. Tunngaviusumik inuussutissarsiutinik ilinniartitsinermut isersinnaanermut piumasaqaataavoq qinnuteqartoq tiguneqarnissani sioqqullugu atsiorneqarsimasumik lærlingitut isumaqatigiissuteqareernissaa imaluunniit ilinniartitaanissamut isumaqatigiissuteqareernissaa, taamaattoq tak. § 7a.</i>"</p> <p>Imm. 4-5 taamaasilluni tassaalissapput imm. 5-6.</p>
	<p>5. § 7 kingorna ikkunneqarpoq: " § 7 a. Inuutissarsiutinik ilinniarfiit aamma qitiusumik ilinniarfiit, lærlingitut isumaqatigiissuteqareernissaaq imaluunniit ilinniartitaanissamut isumaqatigiissuteqareernissaaq pillugu piumasaqaat, tak. § 7, imm. 4, naammassineqanngikkaluartoq tunngaviusumik inuussutissarsiutinik ilinniartitaanerni qinnuteqartunik akuersisassapput ,</p> <p>1) suliffeqarfimmi ilinniarneq ilinniarfimmi ingerlanneqarpat, tak. § 10, imm. 4, imaluunniit</p> <p>2) Ilinniarnermut aalajangersimasumut ilinniartitsinermut pilersaarummi, tak. § 5, imm. 3, qinnuteqartut piffissami tiguneqarfiusumi lærlingitut isumaqatigiissuteqanngikkaluartut imaluunniit ilinniartinneqarnissamut isumaqatigiissuteqanngikkaluartut qinnuteqartut ilinniarnermut tiguneqarsinnaanerini aalajangersaasoqarnissaa Naalakkersuisunit akuerineqarsimalluni.</p>

	<p><i>Imm. 2. Siumoortumik lærlingitut isumaqatigiissuteqarnissaq imaluunniit ilinniartinneqarnissamut isumaqatigiissuteqarnissaq pillugu piunasaqaateqanngitsumik ilinniartitsinermut pilersaarummik akuersinissamut atukkanik piunasaqaatinillu Naalakkersuisut aalajangersaasinnaapput, tassunga ilanngullugu akuersinissamut piunasaqaataasoq ilinniarnep ingerlanerani kingusinnerusumi suliffimmik misiliffissamik ilinniartut pissarsinissaa allatigulluunniit taamaaqataanik ingerlanissanut ilinniartut tiguneqarsimasut qulakkeerunneqarlutik, assersuutigalugu ilinniaatigaluni sungiusarnikkut."</i></p>
	<p style="text-align: center;">§ 2</p> <p>Inatsisartut inatsisaat ulloq 1. august 2023-mi atuutilissaaq.</p>

Tusarniaanermi akissuteqaatinut allakkiaq

Inatsisissatut siunnersuut Namminersorlutik Oqartussat tusarniaavianni piffissami 3. januar 2023-mit 31. januar 2023-mut ukununnga tusarniaassutigineqarluni nassiunneqarpoq:

Kommune Kujalleq

Kommuneqarfik Sermersooq

Qeqqata Kommunia

Avannaata Kommunia,

Kommune Qeqertalik

Sulisitsisut (GE)

SIK

NUSUKA

IMAK

AK

NPK

Inuit Pisinnaatitaaffii pillugit Nunatsinni Siunnersuisoqatigiit

Inuit Pisinnaatitaaffii pillugit instituti

ILI ILI

Avalak

ASG

MIO

Inuit Innarluutillit Illersuisuat

Nuuk International Friskole

Knud Rasmussenip Højskolia

Sulisartut Højskoliat

Avannaani Ilinniarnertuunngorniarfik

Qeqqani Ilinniarnertuunngorniarfik

Kalaallit Nunaanni Teknikimik Ilinniarfik (KTI)

Campus Kujalleq

INUILI

Imarsiornermik Ilinniarfik

NI-Nuuk

Peqqissaanermik Ilinniarfik

Qitiusumik Ilinniarfiit ataatsimut siunnersuisoqatigiivi/Kalaallit Nunaanni Qitiusumik

Ilinniarfiit (KNQI)

Ilisimatusarfik

Perorsaanermik Ilinniarfik

Savaatinngorniarfimmi ilinniarfik

Eqqumiitsuliornermik Ilinniarfik

Isiginnaartitsisunngorniarfik
Nuna Tamakkerlugu Ilitsersuisarfik

Tusarniaanermut piffissaliussap naanerani tusarniaanermut akissutit tiguneqarsimapput, taakkulu tusarniaaffigineqartunit ukuninngaaneersuupput: Kommuneqarfik Sermersooq, Sulisitsisut, Inuit Piginnaatitaaffii pillugit Siunnersuisoqatigiit, Kalaallit Nunaata Isiginnaartitsisarfia aamma Nunatta Isiginnaartitsinermik Ilinniarfia, Qeqqata Kommunua, KNQI, SIK aamma KTI.

Tusarniaanermi siunnersuummut annertuumik akuersaartoqarpoq tassalu inuussutissarsiutinut ilinniartitsinernut ilinniartoqarsinnaanngussasoq sungiusarluni sulinermit isumaqatigiissuteqaqqaarsimannikkaluarluni.

Kommuneqarfik Sermersooq:

Kommuneqarfik Sermersuup allappoq, tusarniaassutigineqartumut oqaaseqaatissaqanngitsoq taamaattumillu inuussutissarsiutinik ilinniartitsinerni ilinniartunngortussat amerlanerit tiguneqartalernissaannut siunnersuut akuersaarnartinneqartoq.

Inuit Piginnaatitaaffii pillugit Siunnersuisoqatigiit:

Inuit Piginnaatitaaffii pillugit Siunnersuisoqatigiit allapput siunnersuut annertuumik akuersaarnartikkitsik, allannguutissammi nunatsinni inuussutissarsiutinik ilinniartitsinernut isernissamut piginnaatitaaffiit nukittorsarneqassammata. Siunnersuisoqatigiillu peqatigisaanik taavaat ilinniagaqarniarlutik qinnuteqartut pitsaanerusement sungiusarluni suliffissamik periarfissaqarnissaat qulakkeerniarlugu inuussutissarsiutinik ilinniartitsinerit aamma inuussutissarsiortut akornanni suleqatigiinnerup oqaloqatigiinnerullu nukittorsarnissaannut suliniuteqarnissap eqqarsaatigineqarsinnaanera Naalakkersuisut eqqarsaatigisinnaagaat.

Ilanngullugu taaneqassaaq 2010-mi iluarsartuusseqqinnermi siulersuisunik pilersitsinikkut suliffeqarnermi kattuffiit peqataatinnerisigut sungiusarluni suliffissat amerlisarnissaannik siunertaqarneq anguneqarsimannngimmat, ilaatigullu siunnersuut manna kiisalu inatsisiliornerit allat pisariaqartilersimavaat assersuutitut ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. 17, 27. november 2020-meersoq. Inatsisartut inatsisaanni atuuttumi § 43, imm. 1-imi aalajangersakkamut oqaaseqaatini allassimavoq qitiusumik ilinniarfintut siulersuisoqarnerup aqqissuunneqarnerani piunasaqineqartoq siulersuisut suliffeqarfinnik oqaloqatigiinnerit aallaavigalugit sungiusarluni suliffissat amerlanerulernissaat anguniarlugu immikkut suliniuteqartoqassasoq.

Sulisitsisut:

Sulisitsisut allapput, siunnersuut taamatut isikkoqartillugu taparserneqartoq, Sulisitsisut Ilinniartitaanermut Naalakkersuisoqarfimmut saqqummiunniukuusaannut tamatigut

naapertuummat. Tassunga atatillugu sulisitsisut innersuuppaat inuusuttut pineqartut ilinniakkamik aallartitsinissaat anguniarlugu pilersaarusiornerit aamma suleqatigiissitat Naalakkersuisut pilersissimasaat.

Aamma allanik siunnersuummut toqqaannartumik tunngassuteqanngitsunik Sulisitsisut saqqummiussaqarput. Assersuutitut saqqummiunneqarpoq Naalakkersuisut inuttut aningaasatigullu sillimmatit pigineqartut amerlanngitsullu alaatsinaattariaqaraat iluarsartuusseqqinnerit qulakkeernerisigut ilinniartitsissutigineqartullu atuuttut inerisarnerisigut. Aamma saqqummiunneqarpoq ilinniartitsissutigineqartut Naalakkersuisoqarfinnut ilinniarfinnullu arlalinnut agguaannagit eqiterneqartariaqartut ilinniarnermi avatangiisut annertunerusut pitsaanerusullu pilersinniarlugit aamma sillimatinik pitsaanerusumik atuilluarnissaq piginnaasanillu kivitsinissaq qulakkeerniarlugu. Sulisitsisullu saqqummiuppaat inuk tikillugu ilitersuisarnerup ingerlallualernissaa suliniutigisariaqartoq, taamaalilluni inuusuttut pisariaqartitsisut inuussutissarsiutinik ilinniartitsinermik aallartissinnaaqullugit. Naggataatigullu innersuussutigineqarpoq Naalakkersuisut nunatta karsiata aningaasaqarnera killeqartoq atussagaat qitiusumik ilinniarfiit naammattunik aningaasaqarnikkut sinaakkutissinneqarnissaannut ilinniartut inissiaat inillu ilinniartitsiffissat qulakkeeriarlugit.

Kalaallit Nunaata Isiginnaartitsisarfia aamma Nunatta Isiginnaartitsinermik Ilinniarfia: Kalaallit Nunaata Isiginnaartitsisarfia aamma Nunatta Isiginnaartitsinermik Ilinniarfia allapput siunnersuut tapersorsorlugu maluginiaqqullugulu ineriartortitsinerup nalaaniikkamik. Maannakkut suli inuutissarsiutinik ilinniarfiupput kisiannili eqqumiitsusiornermik bachelorinnngorniarfittut ikaarsaariartussaallutik. Aamma allapput innersuussinermi kukkusoqarsimasoq siunnersuummi § 1, nr. 3-mut tunngatillugu. Allassimapput siunnersuutip nr. 3-ani § 7, imm. 1 pillugu innersuunneqartariaqaraluartoq siunnersuummi imm. § 2-6 tassalu imm. 2-5 pinnagu. Tamanna siunnersuummut ilanngunneqanngilaq, tassami imm. 6-i nutaaq tassaammat aalajangersagaq piginnaatitsissutaasoq § 7, imm. 1-imut innersuussisussaanngitsoq.

KNQI:

KNQI-p akissuteqaataani allassimavoq nuannaajallaatigineqartoq Naalakkersuisut siunnersuutikkut qulakkeerniarmassuk inuusuttut amerlasuut maannakkut tunngaviusumik inuutissarsiutinik ilinniartitsinerni tiguneqartartut kisianni sungiusarluni suliffissarsinngitsoortartut taamaalillutillu ilinniakkamik aallartitsinngitsoortartut siunissami ilinniakkamik aallartitsisinnaanngussammata.

KNQI-p aamma malugeqquaa ilinniakkat parlakaattumik ilinniarniviit pigiinnarnissaat pingaaruteqarmat. Nangilluni KNQI allappoq Inuilimi aamma KTI-mi ilinniarfimmi sungiusarluni sulinerit takutikkaat ilinniarfimmi sungiusarlutik sulisut sungiusarluni suliffeqarfinnut kajuminnartuusut ilinniarnernup ukiuani aappaani, pingajuani sisamassaanilu, Danmarkimili misilittakkat takutikkaat ilinniakkamik naammasserlaat ilinniarnertik tamaat

ilinniarfimmi sungiusarlutik sulisimasut suliffittaarniarlutik qinnuteqartuni kingulliunneqartartut, tassami sungiusarluni sulinerit piviusut amigaataasarmata. KNQI-p ilannguppaa maani suli misilittagaqarfigineqanngitsoq ilinniarneq tamakkerlugu ilinniarfimmi sungiusarluni sulinerimik ingerlataqarsimaneq, kisianni KNQI isumaqarpoq ilinniakkamik naammasserlaat ilinniarnermi suliffeqarfinni sungiusarlutik sulisimannngitsut suliffeqarfinnut pilerinassuseqarnerat annikinnerussasut.

Matumuuna maluginiaqquneqarpoq suliffeqarfinni sungiusarluni sulinerup taamaatinneqarnissaa pilersaarutigineqanngimmat, taamaallaalli suliffeqarfinnut sungiusarluni sulinerit piumasaqaatit aalajangersimasut iluanni kinguartinneqarsinnaanissaat ilinniarnermi kingusinnerusukkut pisinnaanngorlugit siunnersuutigineqarmat. Aallaavigineqartussarli suli tassaassaaq, tak. § 7, imm. 4, tunngaviumik inuutissarsiutinut ilinniartitsinermik aallartittoqarsinnaammat lærlingitut isumaqatigiissuteqareersimappat imaluunniit ilinniartitaanissamut isumaqatigiissuteqareersimappat. Siunnersuutip ajornarunnaarsippaa ilinniakkani aalajangersimasuni ilinniarnermi sungiusarluni sulinerit ilinniarnermi kingusinnerusukkut pisinnaanngornissaat.

KNQI nangilluni allappoq ukiuni aggersuni lærlingitut isumaqatigiissuteqarnerit aamma ilinniartitaanissamut isumaqatigiissuteqarnerit malunnaatilimmik qaffariaateqarnissaannut isumaqatigiissutigineqartup piviusunngortinneqarneranut illuatungeriit akisussaaffimmik tigusinissaat pingaaruteqartorujussuusoq siunnersuut akuersissutigineqarpat aamma piviusunngortinneqalerpat.

Aamma Inatsisartut inatsisaanni § 43, imm. 1 innersuunneqassaaq tassani allassimavoq inuutissarsiutinik qitiusumillu ilinniarfiit sungiusarluni suliffissat isumagissagaat, ilinniarfiillu pisussaaffigigaat namminneq ornigullutik ingerlatsinissartik sungiusarluni suliffissanik pissarsiniarnissaaq siunertaralugu. Aalajangersakkamut oqaaseqaatini allassimavoq pingaartumik suliffeqarnikkut kattuffiit qitiusumik ilinniarfiit siulersuisuini peqataanerisigut siulersuisullu suliffeqarfiit oqaloqatiginerisigut sungiusarluni suliffissat amerlisarneqarnissaat sulissutigineqassasoq.

Siunnersuutip aningaasaqarnikkut kingunerisassaanut oqaaseqaatinut KNQI aamma allappoq, pingaaruteqarluinnartoq qitiusumik ilinniarfinit piaartumik ilinniarfimmi sungiusarluni sulinerup aallartisarneqarnissaa pillugu pisariaqartitat pillugit oqaloqateqarnissaaq, ullumikkut inuutissarsiutinik ilinniartitsinernik aallartissinnaanngitsut eqqarsaatigalugit siunnersuut taakkununga ilumut iluaqutaalissappat.

Siunnersuummi ilinniarfimmi sungiusarluni sulinerup annertusarnissaa pineqanngilaq, taamaallaalli ilinniarnernup allatut aqqissuunneqarnissaa pineqarluni, taamatullu suliffeqarfinni sungiusarluni sulinissaaq aallaavigineqarpoq tamannali kingusinnerusukkut pisinnaanera alaatsinaanneqarluni.

Ilanngullugu taaneqassaaq inuutissarsiutinik ilinniarsinnaanermut piumasaaqatit maannatut isikkoqassammata sulilu apeqqutaassalluni qinnuteqartoq atsiugaqarsimassasoq lærlingitut isumaqatigiissummik imaluunniit ilinniartitaanissamut isumaqatigiissummik. Kisianni sungiusarluni sulinissat kingusinnerusukkut pisinnaangornissaat siunnersuutip ajornarunnaarsissavaa.

Aamma KNQI-p innersuussutigaa sillimatinik ataqatigiissaarinerup pingaaruteqarnera il.il. suliniuteqarnermi, innersuullugulu Isumaginninnermut, Suliffeqarnermut, Nunamullu Namminermt Naalakkersuisup produktionsskolenik pilersitsisinnaaneq pillugu suleqatigiissitaq pilersissimasaa, taakkunanilu inuusuttut pineqartut siunnersuummi tunngasinnaapput. Nangilluni KNQI allappoq, taamatut ataqatigiissaarineq ajornannginnerullunilu kimeqarnerusinnaasoq ilinniartitaanermut oqartussaaneq naalakkersuisoqarfimmi ataatsimi inissinneqarsimappat, ilanngullugillu AMA-p aamma PKU-p suliassaqarfii taallugit.

Tassunga tunngatillugu taaneqassaaq suliniutinik pisariaqartumik ataqatigiissaarinissamut apeqqut tamanna Naalakkersuisut alaatsinaakkaat, aammali ilanngutissallugu siunnersuummi inuusuttut anguniarneqartut aamma produktionsskoleni ilinniartut tamatigut assigiissuteqanngimmata. Sungiusarluni suliffissamik pissarseqqaanngikkaluarluni inuutissarsiutinik ilinniartitsinernut ilinnialersinnaaneq siunnersuummi pineqarpoq. Produktionsskolelli immaga ilusilerneqarsinnaapput inuusuttunut atuagarsorfiusunut piginnaasartuujunngitsunut, kisiannili assasornernut assigiinngitsunut piginnaasaqartunut piginnaangorsaaqqinnerlu aqqutigalugu soorlu tunngaviumik inuutissarsiutinut ilinniartitsinernut ilinnialersinnaanerat piareersarneqarsinnaavoq.

Aamma KNQI-p siunnersuutigaa “Naalakkersuisut akuerisaat” nr. 2-mit peerneqassasoq § 7a-mut nutaamut tunngatillugu, tamannami § 5, imm. 2-mi allassimareermat. Tamanna pillugu oqaatigineqassaaq taaneqartoq Naalakkersuisut akuersissuteqarnissaat § 7a-miittoq immikkut akuersissuteqarnissamut tunngammat pineqaranilu qitiusumik ilinniarfiit ilinniartitsinermut pilersaarutaannut tamanut Naalakkersuisut akuersissuteqartarnissaat. Kiisalu oqaatigineqassaaq § 7a-mi § 5, imm. 3-mut innersuussisoqarmat, § 5, imm. 2 pinnagu. Tamatumani siunertarineqarpoq sungiusarluni suliffissaq pillugu immikkut akuersissuteqarnissamut piumasaaqataassasoq ilinniartitsinermut pilersaarummi inaarlugu sularineqarsimasumi imaluunniit ilinniakkamut aqqissuussinermi allassimanissaata alaatsinaanneqarnissaa, taakkulu Naalakkersuisunut nassiunneqassapput.

Naggataatigullu KNQI-p tusarniaanermi oqaaseqaatini allappaa, INUILI eqqaassanngikkaanni, allannguutissatut siunnersuutip 1. august 2023-mi atuutilersinneqarnissaa siusippallaartoq, tassami sungiusarluni sulinerup allanngortinneqarnissaa ilinniartitsinermut pilersaarummiilernissaanut tunngatillugu ilinniakkami holdinut taxameterinut najoqqutassanik nutaanik pilersitseqqaarnissaq kingunerisussaammagu.

Tamanna paatsoornermik tunngaveqarsorinarpoq, tassami siunnersuummi sungiusarluni suliffissanik amerlanernik pilersitsinissaq pineqanngimmat, tassungalu tunngatillugu sungiusarluni suliffissat ilinniarfimmi sungiusarluni sulinissamik taarserneqarnissaat pineqarani. Siunnersuutip pingaarnertut siunertaraa aamma nutaartaraa siunnersuummi § 1, nr. 5 pillugu, § 7a, imm. 1, nr. 2-imut oqaaseqaatit oqaasertalernerani taaneqartoq. Aalajangersakkami pineqarpoq ilinniartitsinermut pilersaarutinik aalajangersaasinnaaneq, naallu inuutissarsiutinik ilinniartitsineq pineqaraluartoq ilinniarneq aallartinneqarsinnaasoq lærlingitut imaluunniit ilinniartinneqarnissamik isumaqatigiissuteqanngikkaluarluni ilinniarfimmi sungiusarluni sulinani. Suliffeqarfimmi sungiusarluni sulinissamat taarsiullugu assersuutitut ukiumi ataatsimi tunngaviusumik ilinniarnermik aallarniisoqarsinnaanera aalajangersakkap pisinnaalersippaa. Aalajangersakkap kingunerisinnaavaa ukiumi siullermi sungiusarluni sulinissat kingusinnerusukkut ilinniarfimmi sungiusarluni sulinermik taarserneqarsinnaanerat. Akerlianilli aalajangersagaq isumaqanngilaq ilinniarnermi sungiusarluni sulinerit tamatigut ilinniarfimmi sungiusarluni sulinernik taarserneqartassasut, aammalu ilinniarfimmi sungiusarluni sulinerit amerlanerusut pilersinneqassasut.

Ilinniartut ilinniarnermi kingusinnerusukkut sungiusarluni suliffissamik isumaqatigiissuteqartarnissaat aalajangersakkap kingunerissavaa, taamaattumillu sungiusarluni suliffissamik isumaqatigiissuteqartarnissaq tunngaviatigut suli atuutissaaq. Sungiusarluni suliffissamik isumaqatigiissuteqarneq tunngavigalugu suliffeqarfimmi sungiusarluni sulinissamik piumasaqaat taamaattumik suli atuutissaaq tassalu ilinniakkamik naammasserlaaq ilinniarnermi suliffeqarfimmi sungiusarluni sulisimannngitsup suliffeqarfinnit sulisussatut piumaneqannginnerussasumik KNQI-p isumagalugu oqaatigisaa assigissallugu.

Suliffeqarfinni sungiusarluni sulinerit inuutissarsiutinik ilinniartitsinerni kingusinnerusukkut pisussanngornerat ilinniakkami pineqartumi holdinut taxameterinik nutaanik pilersitsinissamik kinguneqassaangilaq.

Aamma oqaatigineqassaaq, siunnersuummut nalinginnaasunik oqaaseqaatini taaneqartut, siunnersuutip qitiusumik ilinniarfiit pisussaaffigilinnngimmagit ilinniartitsinermut pilersaarutinik allannguinnissaannik, tamannali aatsaat pisassaaq qitiusumik ilinniarfiup nalilerpagu lærlingitut imaluunniit ilinniartinneqarnissamik isumaqatigiissuteqaqqaanngikkaluarluni imaluunniit ilinniartitaanissamat isumaqatigiissuteqanngikkaluarluni ilinniarneq ingerlanneqarsinnaasoq tassungalu atatillugu qulakkiissallugu ilinniartut lærlingitut imaluunniit ilinniartinneqarnissamik isumaqatigiissuteqarsimannngitsut kingusinnerusukkut ilinniarnerp inglerlanerani lærlingitut imaluunniit ilinniartinneqarnissamik isumaqatigiissuteqarnikkut. Soorlu tamanna pisinnaavoq pilersaarusiornikkut lærlingitut imaluunniit ilinniartinneqarnissamik isumaqatigiissuteqarnissamik piumasaqaateqarnerup kingusinnerusukkut ilinniarnerp

ingerlanerani qanoq eqqortinniarneqarnersoq aamma ilinniakkap neqeroorutiginiisaanut ilinniartoqarsinnaanermut piginnaasat pigineqarnersut uppersarneratigut, tassani ilaassapput illinniartitsisut, ilinniartitsiviit, atortussat, ilinniartunut inissiat il.il. naammattut pigineqarnersut.

Aamma KNQI-p tusarniaanermut akissuteqarnerani allassimavoq qitiusumik ilinniarfiit tamarmik, KTI ilanngullugu, ilinniartunngortinneqartartut amerlisissallugit periarfissaqanngitsut, amerlanerusunik ilinniartunik tiguisoqassappat ilinniartunut inissianik sanaartornissamik, siunnersuummi oqaaseqaatini taaneqartutut, kinguneqassammat.

Tassunga tunngatillugu oqaatigineqassaaq siunnersuutip siunertarimmagu sungiusarluni suliniissamut isumaqatigiissuteqaqqaanngikkaluarluni inuutissarsiutinik ilinniartitsinermik ilinnialersinnaanerup periarfissinneqarnissaa, pineqaranili inuutissarsiutinik ilinniartitsinermik ilinniagaqalernermi ilinniartunut inissiamik qulakkeerinnittoqartalernissaa. Taamaattumik oqaaseqaat ajornartorsiummut allamut tunngassuteqarsorinarpoq, ilinniartunullu inissianut taakkunungalu malittarisassanut tunngassuteqarluni.

Naggataatigut KNQI-p aamma oqaaseqarfigaa aningaasanut inatsisiliornermi suleriaatsip ilinniartitsinernut suliniutit pisariaqanngitsumik kinguarsartarai, kattuffillu isumaqarpoq tamanna assersuutissaalluortoq. KNQI kaammattuivoq suleriaaseq eqaallisaqqinneqassasoq, 12. marts 2022-mit allakkani siunnersuutigineqartutut.

Pisortani akileraarutinik aningaasaliissuteqarnikkut nalinginnaasunik suliassanik aallartitsinermi aningaasaliissutinut inatsisitigullu tunngaveqarnissamut piumasaqaatit innersuunneqassapput. Assersuutitut ilinniartitsinermut akuerisaasumut aningaasartuuteqartoqarsinnaanngimmat Inatsisartut siuliani aningaasat inatsisaanni aningaasaliisimangippata, tak. kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. 26, 28. november 2016-imeersoq, tassungalugu ilanngullugu takoqquneqarluni aningaasanut inatsisip aqqissugaanera aamma allaffissornikkut aningaasanut inatsisip suliarineqarnerata ingerlasarnera pillugit Namminersorlutik Oqartussat nalunaarutaat nr. 44, 27. november 2020-meersoq. Aningaasaliissutinut inatsisitigut tunngavissanut tunngatillugu Inatsisartut inatsisaanni taaneqartumi allassimavoq Naalakkersuisut ilinniartitsinermut pineqartumut pilersaarummut inaarlugu suliarineqarsimasumut akuersisassasut. Tamanna tunngavigalugu taamaattumik ajornakusoorpoq nutaanik ilinniartitsinernik suliniutinik akuersinissamut suleriaaseqarnissap siuartinnissaa, soorlu ilinniartitsinernut missiliuutit kisiisa tunngavigalugit, allaasereqqaarnagit erseqqissaqqaarnagillu pisortat aningaasaataat sunut atorniarneqarnersut.

SIK:

Siunnersuut tapersorsorlugu SIK allappoq taannalu qulakkeerinneqataassasoq ilinniartut amerlanerit ilinniagaqalersinnaanerannut nalilerlugu. Aamma SIK neriuppoq siunnersuut inuiaqatigiinnut pingaartumillu inuusuttunut ilinniakkamik aallartitserusuttunut

iluqaataassasoq. Inuusuttut amerlanerusut inuutissarsiutinik ilinniartitsinermik naammassisaqarpata eqqarsaatigineqarsinnaavoq taakku ilinniartunut inissiani najugaqalersinnaanerit qanoq pitsanngorsarneqarsinnaanersoq inuusuttunut ilinniarneq aamma najugaqarneq imminut ataqatigiimmata.

Matumani innersuutigineqassaaq siunnersuutip siunertaa pingaarneq, tassaasorlu inuutissarsiutinik ilinniartitsinernut ilinnialernissamut periarfissanik qulakkeerinninnissaq, naak sungiusarluni suliffissamik pissarseqqaanngikkaluarluni. Siunnersuummi tunngaviatigut pineqanngilaq inuutissarsiutinik ilinniartitsinermut piunasaqaataassasoq ilinniartunut inissiamik qulakkeerlugu pissarseqqaarsimanissaq. Siunnersuummi siunertaavoq ilinniartut sungiusarluni suliffissamik pissarsinnaasimanngitsut ilinniakkamik aallartissinnaanissaannut ammaassinissaq aamma ilinniarfiit piginnaasaasa atorluarnerunissaat. Kisianni tamatuma apeqqutip pingaaruteqarnera pissutigalugu, minnerunngitsumillu avataanit ilinniagaqarnissamut qinnuteqartut pissutigalugit, tassani pineqarlutik qinnuteqartut illoqarfiup ilinniarfeqarfiusup avataani najugaqartut ilinniartut inissiaanni inissaqartinneqarnissaat ilanngullugu annertuumik alaatsinaanneqarsimavoq, ilinniartut inissiaannut immikkoortumut pilersaarummut taassumalu nutarterneqarnissaannut tunngatillugu.

KTI:

KTI aallarniutigalugu KNQI-p tusarniaanermi akissutaanut aamma siulersuisut 22. februar 2022-mi allagaannut innersuussivoq taamani suleqatigiit H2 – Inuutissarsiutinut- Suliffeqarnermut- Ilinniartitaanermullu suliamut suliniutinut allaffeqarfimmi oqaloqateqarnermut tunngatillugu, tak. tamatumunnga siunnersuummut oqaaseqaatit nalinginnaasut qulaani aallartinnerani saqqummiunneqartut immikkoortumi 1.1-imi.

Nangillugu KTI-p eqqarsaatit arlaqartut saqqummiuppai, siunnersuutip inatsisitigut oqaasertaannut tunngassuteqanngitsut. Ilaatigut oqaatigineqarpoq inuusuttut meeqqat atuarfiannik naammassinnittut 60 %-ii ilinniakkamik aallartitsineq ajortut pingaaruteqartorlu atuarfimmik naammassisaqarnerup kinguninnguatigut ilinniakkamik aallartitsinissaq. Tamanna allamik unammillernartunik kinguneqassaaq, socialpædagoginik tapersersorteqarnissaq pisariaqartinneqassaaq, soorlu nerinermi najuuttartussanik, nakkutilliisunik, ullormi ilinniarfiusup avataani ilikkagassatigut ikiorsiinissat aamma inuusuttut ilinniakkamiiginnarnissaat pillugu. Aammalu innersuutigineqarluni ilinniarfiit illusaasa allineqarnissaat pisariaqartinneqassasut, soorlu sulliviit aamma teoreertarfiit, kiisalu 2023-26-mut anguniakkanik isumaqatigiissuteqarnermi teoreertarfiit ilanngunneqartariaqartut. Tamanna sulliviit annertusarnissaannik pisariaqartitsineq aamma kingunerissavaa. Qulaani taaneqartut ilagaat ilinniakkat ilaanni suliffissaarussinnaanermut ilinniartitsisoqarsinnaasoq suliffeqarfinnik atorfinitsitsisinnaanerit killeqarmata, soorlu biilnik suliffeqarfiit eqqarsaatigalugit. Taamaattumik innersuutigineqarpoq ilinniakkat ilaanni annertussusiliisoqassasoq suliffissaarunnissaq pinngitsoorniarlugu. KTI-p innersuussutigaa ilinniartut sungiusarluni suliffissaqanngitsut ilinnialersinneranni ilinniartussanik tiguisarneq

marlunnut immikkoortineqassasoq tullerriarinermi allattorsimasussat suliarinerisigut, kikkut ilinniakkami maannakkut aallartissinnaanersut kikkullu immikkoortumut 2-mut utaqqisariaqartut. Peqatigisaanik KTI-p allassimavai tullerriarinissamut allattuiffissamut siunnersuutit, tassani nalunaarneqassallutik lærlingit sungiusarluni suliffissarsereersimasut siulliunneqartassasut.

Tassunga oqaatigineqassaaq tullerriarinissamut apeqqutit qitiusumik ilinniarfimmuut siulersuisut pitsaanerusequmik aqussinnaagaat ilinniakkanut ilinniartitsinermut pilersaarutit tunngavigalugit, tassani allassimassaaq ilinniakkamut piimasaqaatit suunerat. Maannakkut malittarisassat atuuttut naapertorlugit aamma tamanna periarfissaareerpoq.

Ilinniartunut inissianik pisariaqartitsinermut tunngatillugu tamanna pillugu SIK-p oqaaseqaataanut ilinniartut inissiaat pillugit immikkoortortami pilersaarutit taakkulu nutarternissaannut pillugit akissuteqaatit innersuunneqassapput.

Qeqqata Kommunia:

Naggataatigut Qeqqata Kommunia allappoq siunnersuut tapersorsorneqartoq tusarniaanermilu allakkiap suliarineqarneranut nersorinnillutik.